

## REGLUGERÐ

### um Verðlagsráð sjávarútvegsins.

#### 1. gr.

Ráðherra sá, sem fer með sjávarútvegsmál, skipar fulltrúa og varafulltrúa í Verðlagsráð sjávarútvegsins til tveggja ára í senn miðað við 1. október. Starfsár ráðsins er frá 1. október til 30. september.

#### 2. gr.

Á fyrsta fundi verðlagsráðs hvert starfsár, kýs ráðið sér formann og ritara, annan úr hópi fiskisöluaðila, en hinn úr hópi fiskkaupenda, svo og varaformann og vararitari á sama hátt, og skulu þeir í samráði við framkvæmdastjóra undirbúa fundi ráðsins.

#### 3. gr.

Verðlagsráð ræður sér framkvæmdastjóra, með samþykki ráðherra, til að annast dagleg störf. Framkvæmdastjóri ræður, í samráði við verðlagsráð, annað starfsfólk eftir því, sem þörf krefur.

#### 4. gr.

Kjósi aðili að verðlagsráði að neyta heimildar laga til að skipta um fulltrúa í ráðinu eftir því hvers konar verðákvæðanir skulu teknar, skal tilkynna ráðuneytinu þá staðgengla sem varafulltrúa í ráðið. Fulltrúaskipti skulu tilkynnt framkvæmdastjóra verðlagsráðs með nægum fyrirvara, áður en fundir hefjast, fyrir hvert verðákvæðunartímabil. Sömu fulltrúar skulu að forfallalausú sitja alla fundi ráðsins um hverja verðákvæðun, þar til henni er lokið.

#### 5. gr.

Framkvæmdastjóri, í samráði við formann og ritara verðlagsráðs, skal boða fundi í verðlagsráði. Tilkynna skal fulltrúum í verðlagsráði með a. m. k. 7 daga fyrirvara, hvenær fundir skuli hefjast um hverja verðákvæðun. Geti skipaður aðalfulltrúi ekki mætt á fundi ráðsins vegna forfalla, skal hann koma boðum þar um til varafulltrúa síns í verðlagsráði og framkvæmdastjóra, svo tímanlega, að varafulltrúi eigi þess kost að mæta á þeim fundi.

#### 6. gr.

Enginn fulltrúi getur farið með nema eitt atkvæði á fundum verðlagsráðs. Verðlagsákvæðanir verða því aðeins teknar, að ráðið sé fullskipað. Þó getur enginn fulltrúi hindrað starfsemi ráðsins með fjarveru, hafi hann verið löglega boðaður til fundar. Um málefni, er allir verðlagsráðsmenn fjalla um, skal tilhögun vera sú, að aðilar tilnefndir af seljendum og kaupendum skulu fara með 6 atkvæði hvorir um sig, er skiptast jafnt á viðstadda fulltrúa. Séu atkvæði jöfn í máli, er ekki varða verðákvæðanir, sker sjávarútvegsráðherra úr.

#### 7. gr.

Verðlagsári fiskideildar, vegna verðákvæðunar á bolfiski og flatfiski, skal skipt í eftirtalin 3 veiðitímabil:

- A) 1. janúar til 31. maí,
- B) 1. júní til 30. september,
- C) 1. október til 31. desember.

Verð á öðrum tegundum sjávaraflla, að undanskilinni síld, svo sem rækjum, humar o. fl., skal verðlagsráði heimilt að ákveða á öðrum tíma en greinir hér á undan eftir því, sem þörf krefur hverju sinni.

## 8. gr.

Verðlagsráð (fiskideild) skal leitast við að ná samkomulagi um lágmarksverð fisktegunda fyrir eitt ár í senn, og skal þá hafa lokið verðákvörðunum sínum fyrir 10. desember ár hvert. Náist ekki einróma samkomulag í verðlagsráði um verð fyrir tilskilinn tíma, skal vísa ágreiningsatriðum til yfirnefndar þegar í stað. Yfirnefndin skal hafa felld fullnaðarúrskurð um ágreiningsatriði og tilkynnt fiskverð eigi síðar en 31. desember ár hvert.

## 9. gr.

Kjósi verðlagsráð (fiskideild) að gefa út verðákvörðun fyrir eitt veiðitímabil í senn skv. 7. gr., skal þeirri ákvörðun verðlagsráðs fyrir hvert veiðitímabil vera lokið 20 dögum áður en viðkomandi veiðitímabil hefst. Að öðrum kosti vísast ágreiningsatriðum til yfirnefndar, sem fellir fullnaðarúrskurð um ágreiningsatriði eins og greinir í 8. gr. og skal fiskverð tilkynnt áður en nýtt veiðitímabil hefst.

## 10. gr.

Landinu skal skipt í 2 síldveiðisvæði:

A. Norður- og Austurlandssvæði:

Frá Rit norður um að Hornafirði.

B. Suður- og Vesturlandssvæði:

Frá Hornafirði vestur um að Rit.

## 11. gr.

Verðlagsári síldardeildar á hvoru svæði skv. 10. gr. skal skipt í eftirtalin veiðitímabil:

1. Norður- og Austurlandssvæði:

a. 10. júní til 30. september.

Veiðist síld á öðrum tíma á þessu svæði, skal verðlagsráð ákveða verð á þeirri síld.

2. Suður- og Vesturlandssvæði:

a. 1. marz til 31. ágúst.

b. 1. september til febrúarloka.

Verðákvæðanir síldardeildar verðlagsráðs skulu liggja fyrir með sama fyrirvara og mælt er um í 9. gr. um fiskideild.

## 12. gr.

Verðlagsráðsmönnum svo og starfsmönnum verðlagsráðs er bannað, að viðlagðri ábyrgð eftir ákvæðum almennra hegningarlaga um opinbera starfsmenn, að skýra óviðkomandi aðilum frá þeim atriðum, er þeir verða áskynja um af skýrslum þeim, sem látnar eru verðlagsráði í té samkvæmt lögum nr. 97/1961, svo og því sem fram fer á fundum verðlagsráðs, að því leyti sem það varðar einstaka menn eða einstök fyrirtæki.

## 13. gr.

Reglugerð þessi, sem sett er samkvæmt lögum nr. 97 frá 18. desember 1961, um verðlagsráð sjávarútvegsins, öðlast gildi þegar í stað og birtist öllum þeim, sem hlut eiga að máli.

*Sjávarútvegsráðgjafi, 31. október 1962.*

**Emil Jónsson.**

*Jón Sigurðsson.*